

Fas Jon

Nægkiariien sə rani mə nəfe i nəkukuə

Jon in aposol riti sə Iesu rokeikei pik. In rirai nəkukuə me i Jon, Fas Jon, Seken Jon, mine Namba Tri Jon. In rirai nəkukuə me nəha ipaka ti nuk 90. Fas Jon rəvəhag m nakalasia me mini mə irəha tuhaməkeikei mhəsiari ti nahatən eikuə me kamo nahatən eikuə me həkoui irapw irəha ia suatuk atukwatukw. Nahatən eikuə me nəha kamhəni mə Iesu rīpko mhə in Kristo, Tini Kumwesən. Həni mə Kumwesən rīpkuvehe mhə mo in iərmama rəmwhen ia kitaha. Jon rokeikei mə nakalasia me tuhəukurən mə Iesu in Kumwesən mine in mwi iərmama. Jon rokeikei mə truvehi utə nətərigien səvəi nakalasia me pwəh hərer əknekīn ia nahatətəien səvənraha ia Iesu Kristo mamho nokeikeien. In rini mə kitaha tsaməkeikei mhəkeikei kitaha me, mamhəsiai nəgkiariien me səvəi Kumwesən. Trini minuə samo iamīnha irə, səukurən mə kitaha nīpwnəti Kumwesən me.

Nægkiariien səvəi Nimiruien

¹ *Nægkiariien i səkimaha raməvisau Nægkiariien sə rinarə raka fwe tui nəpīn tīprənə ramiwən ihi. Kimaha iahəuvəregi raka Nægkiariien nəha, mhətoni ia nənimemaha, mhəspau irə, mhərapī ia rəgimaha. Nægkiariien

* **1:1:** Jon 1:1-2,4, 1Jon 2:13-14

nəha in Nimiruien. ² *Nimiruien i riməier pehe tukumaha. Kimaha iahənətoni mhəukurən mə in nīpərhienien. Nənə təkwtəkwuni iahaməni irapw Nimiruien Rerīn i tukumiaha. Fwe kupwən in rīnamarə irau Tata Kumwesən, nənə marə mier pehe tukumaha. ³ Iahaməni irapw tukumiaha narimnari me i iahənətoni mhəregi mə kimiaha tihəuvehe mho pəri nari kitaha m kimiaha. Pərhien kimaha iahamo pəri nari kimaha Tata Kumwesən mine Tini, Iesu Kristo. ⁴ *Nəgkariien me i iahamrai rauvehe tukumiaha mə tro rerimaha ragien.

Navəniēn ia nukuraanien

⁵ *Nəgkariien i kimaha iahəregi in riməni pehe tukumaha, nənə iahaməni pehe tukumiaha, mə Kumwesən in nukuraanien nəpitəvien riwən anan irə. ⁶ *Trini minuə kitaha səni mə samo pəri nari kitaha min, mətə ia navəniēn səkitaha samavən ia nəpitəvien, nənə sameikuə. Noien səkitaha ripkesi pen mhə nəgkariien sə ro nīpərhienien. ⁷ *Mətə trini minuə ia navəniēn səkitaha samavən ia nukuraanien rəmwhen in ramarə ia nukuraanien, nənə kitaha samo pəri nari, nite Tini, Iesu, ramaikuas raka noien ərəha me pam səkitaha, mo kitaha səmher. ⁸ *Trini minuə kitaha səni mə səpko mhə noien ərəha, sameikuə atukw a ia kitaha me, nənə nəgkariien sə ro nīpərhienien riwən ia kitaha. ⁹ Mətə kitaha səukurən nətigiteien ia Kumwesən, noien səvənhi ratukwatukw. Ro

* **1:2:** Jon 1:14 * **1:4:** Jon 16:24 * **1:5:** 1Tim 6:16, Jem 1:17

* **1:6:** 1Jon 2:4 * **1:7:** Jon 3:21, Aes 2:5, Hip 9:14, Rev 1:5, 7:14

* **1:8:** Sam 32:5, Prov 28:13

iaminhi irə, trini minuə səni irapw noien ərəha me səkitaha min, nənə in trenouenou noien ərəha me səkitaha, maikuas raka noien me pam i səno həpkatukwatukw mhə, mo kitaha səmher. ¹⁰ Trini minuə kitaha səni mə səpko mhə noien ərəha, samo Kumwesən mə in ieikuə riti, nənə nəgkiariien səvənhi riwən ia kitaha.

2

¹ *Nipwnətik me. Iakamrai nəgkiariien me i tukumiaha mamınise kimiaha mə tihəpwəh noien ərəha. Mətə trini minuə iərmama riti ro noien ərəha, iərmama riti nəha ikın trasitu ia kitaha, mægkiari tukwini səkitaha m Tata Kumwesən. Iərmama nəha in nəha Iesu Kristo, in iəmə atukwatukw. ² *In remhə niten raikuas raka noien ərəha me səkitaha. In ripkemhə mhə mə niten traikuas raka əpa noien ərəha me səkitaha, mətə in remhə mwi mə niten traikuas raka noien ərəha me səvəi nərmama me ia tənəmtənə me pam.

³ Kitaha səfukurən mə səuvəuvehe mhəuvəukurən pərhien Kumwesən? Trini minuə samo nəgkiariien me səvənhi, noien nəha ramahatən pen. ⁴ *Iərmama sə rani mə in rukurən Kumwesən mətə ripko mhə nəgkiariien me səvənhi, in ieikuə, nənə nəgkiariien sə ro nipərhienien riwən irə. ⁵ Mətə trini minuə iərmama riti ramo nəgkiariien səvəi Kumwesən, in pərhien iərmama i ramokeikei Kumwesən ia noien sə ratukwatukw pam. Kitaha səfukurən mə səpwit əknekın ia Kumwesən? Noien i sə

* **2:1:** Hip 7:25, 9:24 * **2:2:** Jon 1:29, 11:52, Kol 1:20, 1Jon 4:10,14 * **2:4:** 1Jon 1:6,8

takini ramahatən pen. ⁶ Iərmama sə rani mə in rəpwit əknekın ia Kumwesən traməkeikei mavən ia navəniən kuatia nəha Iesu rınavən irə.

Nəgkiariien vi

⁷ *Nipwnətik keikei me. Nəgkiariien i iakamrai m kımiaha rıpkə mhə nəgkiariien vi riti, mətə in nəgkiariien akuas sə hiəuvəregi raka kınani fwe nukunen. Nəgkiariien akuas i in nəgkiariien i sə hiəuvəregi raka. ⁸ *Mətə ia nətoniien riti mwı, nəgkiariien i iakamrai rauvehe tukumiaha, in nəgkiariien vi. Kınətoni ia suatuk vi riti ia nımıruien səvəi Iesu mine səkımiaha ti nəri nə mə nəpitəvien rınakurau mamevən, nukuraanien pərhiən ruvəuvehe maməhiapw.

⁹ *Iərmama sə rani mə in ramarə ia nukuraanien mətə raməmwəki piəvni, in ramarə ihi ia nəpitəvien. ¹⁰ *Iərmama sə ramokeikei piəvni in ramarə ia nukuraanien, nənə nari riti riwən ia narəien səvənhi tro in rapəti mımwei. ¹¹ *Mətə iərmama sə raməmwəki piəvni in ramarə ia nəpitəvien, mamavən ia nəpitəvien, mıreirei kwopun ramevən ikın, ti nəri nə mə nəpitəvien rəuiui nənimen.

¹² *Nəkwərhakwərha me. Iakamrai nəgkiariien i rauvehe tukumiaha, ti nəri nə mə Kumwesən rinenouenou raka noien ərəha me səkımiaha ti nəri Iesu rino.

¹³ *Tata me. Iakamrai nəgkiariien i rauvehe tukumiaha,

* **2:7:** 2Jon 5-6, 1Jon 2:24, 3:11 * **2:8:** Jon 13:34, Rom 13:12, Jon 1:9
 * **2:9:** 1Jon 3:10,15, 1Jon 4:20 * **2:10:** Jon 11:9, Rom 14:13
 * **2:11:** Jon 11:10, 12:35 * **2:12:** 1Kor 6:11 * **2:13:** 1Jon 1:1

ti nəri nə mə kimiaha hiəuvəukurən raka
Iərmama sə rinarə raka fwe tui nəpın
tıprənə ramiwən ihi.

Ntəmaruə me. Iakamrai nəgkiariien i rauvehe
tukumiaha,

ti nəri nə mə kimiaha hiəuvəuvehi irapw raka
niskaiien səvəi iəremhə ərəha Setan.

¹⁴ Nəkwərhakwərha me. Iakamrai nəgkiariien i
rauvehe tukumiaha,

ti nəri nə mə kimiaha hiəuvəukurən raka Tata
Kumwesən.

Tata me. Iakamrai nəgkiariien i rauvehe tukumi-
aha,

ti nəri nə mə kimiaha hiəuvəukurən raka
Iərmama sə rinarə raka fwe tui nəpın
tıprənə ramiwən ihi.

Ntəmaruə me. Iakamrai nəgkiariien i rauvehe
tukumiaha,

ti nəri nə mə kimiaha hiəskai,
nəgkiariien səvəi Kumwesən ramarə ia
rerimiaha,

nənə hiəuvəuvehi irapw raka niskaiien səvəi
iəremhə ərəha Setan.

Tıprənə i mine noien me kamo ia tıprənə i

¹⁵ *Tihəpwəh nokeikeiien noien me səvəi tıprənə
i uə narimnari me səvəi tıprənə i. Trini minuə
iərmama riti rokeikei noien me səvəi tıprənə
i, in rıpkokeikei pərhiən mhə Tata Kumwesən.

¹⁶ *Iakani iamınhi irə ti nəri nə mə nəpın me
pam nərmama me səvəi tıprənə i kamho nəfe
noien ərəha nıpwranraha rokeikei. Nəpın me pam
rerınraha ramevən ia nəfe nənimenraha rətoni

* **2:15:** Rom 8:7 * **2:16:** Rom 13:14, Jem 4:16, 1Tes 2:11

hokeikei mə tuhəuvehi. Irəha kamhərpwi irəha ti nautə me səvənraha. Noien me pam nəha həpkuku pen mhə ti Tata Kumwesən, mətə kamhəuku pen ti tīprənə i. ¹⁷ *Noien me səvəi tīprənə i mine narimnari me nərmama səvəi tīprənə i hokeikei hənəməuvehe tuhəiwən, mətə iərmama sə ramo nəkwai Tata Kumwesən ramarə rerin.

Profet eikuə me

¹⁸ *Nīpwnətik me. Nəpīn sampam i samarə irə. Kimiaha hiəuvəregi raka mə iərmama riti truvehe məmwəki pīk Kristo. Təkwətəkwuni mine nəha nərmama həpik səməme kamhəmwəki pīk Kristo həuvəuvehe raka. Noien i ro nukurənien i tukutaha səukurən mə pərhien nəpīn sampam i samarə irə. ¹⁹ *Nərmama me nəha hənəpwəh kitaha mhəier, ti nəri nə mə rīpko mhə irəha nərmama me pərhien səkitaha. Trīni minuə irəha nərmama pərhien me səkitaha ko kamhəripin, mamharə kitaha minraha. Mətə irəha hənəpwəh kitaha mhəier, mho nukurənien i mə rīpko mhə irəha nərmama me pərhien səkitaha.

²⁰ *Mətə kimiaha hiəuvəuvehi raka Nənīmwin i Kristo Ikinan rīnətəgi pen ia kimiaha, ro pen kimiaha pam hiəuvəukurən nari. ²¹ Rīpko mhə iakamrai nəgkiariien i rauvehe tukumiaha ti nəri nə mə kimiaha hiəreirei nəgkiariien sə ro nīpərhienien, rekəm. Mətə iakamrai nəgkiariien i rauvehe tukumiaha ti nəri nə mə hiəuvəukurən raka nəgkiariien sə ro nīpərhienien, nənə hiəukurən mwi mə neikuəien riti ko rīpkuku

* **2:17:** Mat 7:21, 1Kor 7:31 * **2:18:** 1Tes 4:7, Mat 24:5,24, 2Jon

7 * **2:19:** Wok Me 20:30, 1Kor 11:19 * **2:20:** 1Kor 2:15, 1Jon 2:27

pen mhə irə. ²² *Sin in ieikuə? Iərmama sə rani mə rīpko mhə Iesu in Kristo in ieikuə. Iərmama iamīnha irə in raməmwəki pīk Kristo, manī neikuəien ia Tata Kumwesən mīne Tīni. ²³ *Iərmama sə rani neikuəien ia Tīni Kumwesən, Tata Kumwesən rīpkarə mhə tukwe. Mətə iərmama sə rani irapw Tīni Kumwesən, Tata Kumwesən in mwi ramarə tukwe.

²⁴ Nəgkiariien nəha kīmiaha hiəməregi kīnani fwe nukunen tihətui amasan tukwe p̄wəh rəpwit əknekīn ia rerīmiaha ia nəpīn me. Trīni mīnuə nəgkiariien nəha hiəməregi kīnani fwe nukunen rəpwit əknekīn ia rerīmiaha nəpīn me, kīmiaha mwi tihəpwit əknekīn ia Tīni Kumwesən mīne Tata səvənhi. ²⁵ *Nənə in i nəri Kumwesən rīmāni mə traməkeikei muvei pehe m kītaha: nīmīruien rerīn.

²⁶ Iakamrai nəgkiariien i rauvehe tukumiaha, maməgkiari ia nərmama me nəha səməme kamhəmwur mə tuheikuə ia kīmiaha. ²⁷ *Kīmiaha hiəuvəuvehi raka Nənīmwin sə Kristo rīnətəgi pen ia kīmiaha. Nənīmwin nəha rīnarə raka ia kīmiaha ro pen hiəpkətui mhə mwi iərmama riti mə trahatən kīmiaha. Mətə nənīmwin sə Kristo rīnətəgi pen ia kīmiaha ramahatən kīmiaha ia narīm̄nari me pam. Nənə narīm̄nari me nəha ramahatən kīmiaha irə ro nīpərhienien rīpko mhə neikuəien. Ro iamīnhi irə tihəpwit əknekīn ia Kristo rəmwhen ia Nənīmwin nəha rīnahatən kīmiaha irə.

Nīpwnətī Kumwesən me

* **2:22:** 1Jon 4:3, 2Jon 7 * **2:23:** Jon 5:23, 15:23, 1Jon 4:15, 5:1, 2Jon 9 * **2:25:** Jon 3:15, 6:40 * **2:27:** Jon 16:13

28 *Ouəh n̄ipwnət̄ik me. Tihəpwit əknek̄in ia Kristo mə n̄əp̄in in trier pehe irə kitaha tsəpwəh nehek̄irien, ia nuveheien s̄əv̄ənhi kitaha tsəpwəh naur̄isien ia n̄ənimen. 29 *K̄imiah̄a hiəuv̄əukur̄ən raka mə noien s̄əv̄əi Kumwes̄ən ratukwatukw. Ro iam̄inhi irə hiəuv̄əukur̄ən mwi mə n̄ərmama s̄əm̄əme kamho noien atukwatukw irəha n̄ipwnət̄in me.

3

Kumwes̄ən rokeikei p̄ik kitaha

1 *H̄ətoni ro Kumwes̄ən rokeikei p̄ik kitaha! Nokeikeien s̄əv̄ənhi rasori p̄ik tukutaha ro pen in raməkwein kitaha mə n̄ipwnət̄in me. P̄ərhien kitaha n̄ipwnət̄in me. N̄ərmama s̄əv̄əi t̄ipr̄ənə i h̄əreirei kitaha t̄i n̄əri n̄ə mə h̄əreirei Kumwes̄ən. 2 *N̄ipwnət̄ik keikei me. Təkwtək̄wuni n̄əha kitaha s̄əuv̄əuvehe raka mh̄əno n̄ipwnət̄i Kumwes̄ən me ia kitaha, mətə r̄əpwəh ihi noien nukur̄ənien i mə ts̄əuvehe mh̄əfo irə. Mətə nari kuatia kitaha s̄əukur̄ən. N̄əp̄in Kristo trier pehe irə, kitaha ts̄əuvehe mh̄əmwhen irə, t̄i n̄əri n̄ə mə n̄əp̄in n̄əha kitaha ts̄ətoni in ia n̄ənimetaha. 3 N̄ərmama me pam s̄əm̄əme kamh̄əmri pen əknek̄in n̄ət̄ərigien s̄əv̄ənraha ia Kristo mə tuh̄əuvehe mh̄əmwhen irə kamho noien s̄əv̄ənraha r̄əmher r̄əmwhen ia noien s̄əv̄ənhi r̄əmher.

4 Iərmama s̄ə ramo noien ər̄əha in ram̄ərui Loa s̄əv̄əi Kumwes̄ən. Iakani iam̄inhi t̄i n̄əri n̄ə mə n̄əgkiariien i “noien ər̄əha” n̄ipwran i n̄əruien Loa s̄əv̄əi Kumwes̄ən. 5 *N̄ənə k̄imiah̄a hiəukur̄ən mə

* 2:28: 1Jon 3:2, 4:17 * 2:29: 1Jon 3:7,10 * 3:1: Jon 1:12-13, Jon 16:3 * 3:2: 2Kor 3:18, Fil 3:21 * 3:5: 2Kor 5:21, 1Pit 2:22-24, 1Jon 2:2

Kristo rīmāier pehe mā truvehi raka noien ərəha me. Hiəukurən mā noien ərəha riwən irə. ⁶*Ro iamīnhi irə iərmama sə rəpwit əknekin ia Kristo ko rīpkəmwur pen mhə ia noien ərəha. Iərmama sə raməmwur pen ia noien ərəha rīpkətə raka mhə Kristo mīpkukurən raka mhə mwi in.

⁷*Nīpwnətīk me. Tihəpwəh nəseniien iərmama riti reikuə ia kīmiaha. Iərmama sə ramo noien atukwatukw, in iəmə atukwatukw rəmwhen ia Kristo in iəmə atukwatukw.

⁸*Iərmama sə raməmwur pen ia noien ərəha, in tīni Setan, tī nəri nə mā fwe ia nukune narəien mauvehe Setan ramo noien ərəha. Nəri i in i Tīni Kumwesən rīmāier pehe tukwe mā trouraha noien me Setan ramo. ⁹*Iərmama sə in tīni Kumwesən ko rīpkəmwur pen mhə ia noien ərəha tī nəri nə mā nīmīruien səvəi Kumwesən ruvəuvehe mīno raka kuatia irau nīmīruien səvənhi. In trīpkəmwur pen mhə ia noien ərəha tī nəri nə Kumwesən in Tata səvənhi. ¹⁰Kitaha səfukurən mā nisimə nəha nīpwnətī Setan, nisimə nəha nīpwnətī Kumwesən? Noien i ramahatən pen. Iərmama sə rīpko mhə noien atukwatukw, məpwəh nokeikeiien piəvni rīpko mhə in tīni Kumwesən. In tīni Setan.

Sokeikei kitaha me

¹¹*Nəgkiariien i in i kīmiaha hiəuvəregi raka kīnani fwe nukunen mā kitaha tsaməkeikei mhokeikei kitaha me. ¹²*Kitaha tsəpwəh nəmwhenien ia Ken. In iərmama səvəi Setan. In rousi əpune piəvni anan. Ken rousi əpune piəvni tī nəfe? In rousi əpune tī nəri nə mā noien sə piəvni

* **3:6:** Rom 6:1-2,14, 1Jon 3:9 * **3:7:** 1Jon 2:29 * **3:8:** Jon 8:44 * **3:9:** 1Jon 5:18 * **3:11:** Jon 13:34 * **3:12:** Jen 4:8

ramo ramasan, mətə noien sə in ramo rərəha. ¹³ *Piak me, nənimemiaha trəpwəh nierien nəpɪn tihətoni nərmama səvəi tɪprənə i kamhəmwəki kɪmiaha. ¹⁴ *Kitaha səukurən mə səuvəier raka ia nemhəien mhəuvehe ia nɪmɪruien. Səukurən nəri i tɪ nəri nə mə samokeikei piəvtaha me. Iərmama sə nokeikeiien riwən irə in ramarə ihi ia nemhəien. ¹⁵ *Iərmama sə raməmwəki piəvni in rəmwhen ia iərmama sə ramousi əpune iərmama. Nənə kɪmiaha hiəukurən mə iərmama sə ramousi əpune iərmama nɪmɪruien rerin riwən irə.

¹⁶ *Kitaha səfukurən nəri nokeikeiien? Iesu Kristo rinahatən kitaha irə nəpɪn rinəsəni pehe nɪmɪruien səvənhi tukutaha. Nənə ratukwatukw mwɪ mə kitaha tsəsəni pen nɪmɪruien səkitaha tɪ piəvtaha me. ¹⁷ *Trɪni mɪnuə iərmama riti səvənhi narimnari me səvəi tɪprənə i rasori rətə piəvni riti nari riwən tukwe, mətə in ramo nəri auər a irə, nokeikeiien səvəi Kumwesən trəfo marə irə? ¹⁸ *Nɪpwənətɪk me. Rərəha mə samokeikei nərmama ia tərhutaha a. Kitaha tsaməkeikei mhokeikei pərhien irəha, mho narimnari me tr-asitu ia nɪrəha. ¹⁹ Trɪni mɪnuə samo iamɪnha irə, kitaha səukurən mə kitaha nərmama səvəi nɪpərhienien. Nənə səukurən nuveheien ia nəmri Kumwesən reritaha fwe imwə rəpwəh nehekɪrien. ²⁰ Nəri auər a mə səregi ia reritaha mə səno noien riti rərəha, mətə tsəpwəh nehekɪrien tɪ nəri nə mə Kumwesən in rasori məpi raka reritaha, nənə mukurən pam narimnari.

* **3:13:** Mat 5:11-12, Jon 5:18-19 * **3:14:** Jon 5:24, 1Jon 2:11,
 Mat 5:21-22 * **3:15:** Rev 21:8 * **3:16:** Jon 13:1, Kal 1:4, 1Tes
 2:8 * **3:17:** Dut 15:7 * **3:18:** Jem 2:15-16

21 *Nipwnətik keikei me. Trini minuə kitaha säregi ia reritaha mə səpko mhə noien riti rərəha, tsəpwəh nehekirien ia nəmri Kumwesən. 22 *Nənə nəfe nəghin kitaha tsəres, in truvehi pehe m kitaha, ti nəri nə mə samo nəgkiariien me səvənhi mine nəfe rerin ramagien tukwe. 23 *Nənə in i nəgkiariien səvənhi sə in riməni mə tso. Kitaha tsaməkeikei mhəni nipərhiien ia nəghi Tini, Iesu Kristo, nənə mamhokeikei kitaha me rəmwhen in ruvəni raka tukutaha i. 24 *Iərmama sə ramo nəgkiariien me səvənhi rəpwit əknekın ia Kumwesən, nənə Kumwesən rəpwit əknekın irə. Kitaha səfukurən mə Kumwesən rəpwit əknekın ia kitaha? Nənimwın sə in riməuvei pehe m kitaha ramo kitaha səukurən.

4

Nətə sasien ia nənimwın me

1 *Nipwnətik keikei me. Tihəpwəh niniiien nipərhiien ia profet me pam, mətə tihəkupwən mhətə sas raka ia nirəha mə nənimwın sə ramarə ia nirəha ruku pen pərhiien ti Kumwesən uə rekəm. Iakani iamınhi irə ti nəri nə mə profet eikuə me həpik həuvavən pam ia tənəmtənə me. 2 *Noien nəha sə tro kimiaha hiəregi sas mə nənimwın səvəi Kumwesən ramarə ia iərmama ro iamınhi irə. Trini minuə iərmama rani mə nəpın Iesu Kristo riməuvehe ia tıprənə i nipwran rəmwhen ia nipwrai iərmama, iərmama nəha Nənimwın

* 3:21: Hip 4:16 * 3:22: Mat 21:22 * 3:23: Jon 6:29, 13:34

* 3:24: Rom 8:9, 1Jon 4:13 * 4:1: Mat 7:15, 1Jon 2:18, 2Jon 7, 1Tes 5:21 * 4:2: 1Kor 12:3

sə raku pen ti Kumwesən ramarə irə. ³ *Mətə nərmama me pam səməme həpwəh nini irapwien Iesu Nənimwɪn səvəi Kumwesən rɪpkarə mhə ia nirəha. Nənimwɪn sə ramarə ia nirəha nənimwɪn səvəi iərmama sə raməmwəki pik Kristo. Kimiaha hiəuvəregi raka mə iərmama nəha truvehe, mətə təkwtəkɰuni nəha nənimwɪn səvənhi ruvəuvehe raka ia tɪprənə i.

⁴ *Nɪpwnətɪk me. Kimiaha nə nərmama me səvəi Kumwesən. Hiəuvəuvehi irapw raka nɪskaiien səvəi profet eikuə me nəha ti nəri nə mə Nənimwɪn sə ramarə ia kimiaha nɪskaiien səvənhi rasori məpi raka nənimwɪn sə ramarə ia tɪprənə i.

⁵ *Irəha nərmama səvəi tɪprənə, ro pen nəgkiariien səvənraha səvəi tɪprənə, nənə nərmama səvəi tɪprənə kamhətərig ia nirəha. ⁶ *Mətə kitaha nərmama me səvəi Kumwesən. Ro iamɪnhi irə iərmama sə rukurən Kumwesən ramətərig ia kitaha, mətə iərmama rɪpko mhə in iərmama səvəi Kumwesən in rəpwəh nətərigien ia kitaha. Noien i ro kitaha sətə sas Nənimwɪn sə rani nɪpərhienien mɪne nənimwɪn sə rameikuə.

Kumwesən rɪməkupwən mokeikei kitaha

⁷ *Nɪpwnətɪk keikei me. Pwəh kitaha sokeikei kitaha me ti nəri nə mə nokeikeiien raku pen ti Kumwesən. Iərmama sə ramo nokeikeiien in tini Kumwesən in rukurən Kumwesən. ⁸ *Iərmama sə nokeikeiien səvənhi riwən in rɪreirei Kumwesən ti nəri nə mə Kumwesən in nukune nokeikeiien.

* **4:3:** 1Jon 2:18, 2Jon 7 * **4:4:** Mat 12:29, 1Jon 5:4-5 * **4:5:** Jon 15:19 * **4:6:** Jon 8:47 * **4:7:** 1Jon 2:29 * **4:8:** 1Jon 4:16

9 *Kumwesən rinəfo mo kitaha sətoni nokeikei-
ien səvənhi? In rinərhi pehe Tini anan kuation
ruvehe ia tiprənə i mo suatuk m kitaha səuvehi
nimiruien irə. 10 *Nəri i in nokeikeien pərhi-
en. Ripko mhə kitaha sənokeikei Kumwesən, mətə
Kumwesən rinokeikei kitaha, mərhi pehe Tini
remhə niten raikuas raka noien ərəha me səkitaha.
11 *Nipwnətik keikei me. Kumwesən rokeikei
pik kitaha ro iamihhi irə kitaha mwi tsaməkeikei
mhokeikei kitaha me. 12 *Iərmama riti ripkətoni
raka mhə Kumwesən. Mətə mə kitaha samokeikei
kitaha me, Kumwesən rəpwit əknekən ia kitaha,
nənə nokeikeien səvənhi ruvehe matukwatukw
pam ia kitaha.

13 *Kitaha səfukurən mə səpwit əknekən ia
Kumwesən in rəpwit əknekən ia kitaha? Kitaha
səukurən ti nəri nə mə in riməuvei pehe Nənimwin
səvənhi m kitaha. 14 *Nənə kimaha iahənətoni raka
mamhəni irapw mə nipərhiēnien Tata Kumwesən
rinərhi pehe Tini ruvehe mə truvehimiru
nərmama ia tiprənə. 15 *Iərmama sə rani irapw mə
Iesu in Tini Kumwesən, Kumwesən rəpwit əknekən
irə, nənə in mwi rəpwit əknekən ia Kumwesən.
16 *Kitaha səuvəukurən raka nokeikeien i
Kumwesən ramo m kitaha, səuvəuvehe raka
mhəni nipərhiēnien irə. Kumwesən in nukune
nokeikeien. Ro iamihhi irə iərmama sə ramarə
ia nokeikeien in rəpwit əknekən ia Kumwesən,
Kumwesən rəpwit əknekən irə. 17 *Nəpin

* 4:9: Jon 3:16 * 4:10: Rom 5:8-10, 1Jon 2:2 * 4:11: Mat
18:33 * 4:12: Jon 1:18, 1Jon 2:5-6 * 4:13: 2Kor 1:22, 1Jon
3:24 * 4:14: Jon 3:17 * 4:15: 1Jon 5:5 * 4:16: 1Jon 4:8
* 4:17: 1Jon 2:28

nokeikeien ruvehe matukwatukw pam ia kitaha, noien i tro kitaha səpwəh nehekiriēn ia nəpīn Kumwesən trərpwīn noien ərəha me irə səvəi nərmama. Kitaha tsəpwəh nehekiriēn nəpīn nəha, tī nəri nə mə ia tīprənə i noien səkītaha rəmwhēn ia noien səvəi Kristo. ¹⁸ Iərmama sə ramokeikei Kumwesən ko rīpkhekīr mhə in. Nəpīn kitaha səukurən amasan mə Kumwesən ramokeikei kitaha, kitaha tsəpwəh nehekiriēn. Iərmama ramhekīr tī nəri nə mə rerīn ramrhi nərpwīnien nəha Kumwesən tro, mətə iərmama sə ramhekīr iamīnhi irə rīpkukurən amasan mhə ihi mə Kumwesən ramokeikei in.

¹⁹ Kitaha samokeikei kitaha me tī nəri nə mə Kumwesən rīməkupwən mokeikei kitaha. ²⁰ Trīni mīnuə iərmama riti rīni mə ramokeikei Kumwesən, mətə raməmwəki ihi piəvni, in iekuə riti. Iərmama sə rəpwəh nokeikeiēn piəvni sə ramətoni ia nənimen in ko rīpkokeikei mhə Kumwesən sə rīpkətoni mhə. ²¹ *Nənə nəgkiariēn i in i Iesu rīməuvei pehe m kitaha. Iərmama sə ramokeikei Kumwesən traməkeikei mokeikei mwi piəvni.

5

Iərmama sə rani nīpərhienien ia Iesu Kristo

¹ *Nərmama me pam səməme kamhəni nīpərhienien ia Iesu mə in Kristo sə Kumwesən rīməni mə trərhi pehe i, irəha nīpwnəti Kumwesən me. Nənə kimiaha hiəukurən mə iərmama sə ramokeikei tata riti in ramokeikei mwi nīpwnətīn me. ² Kitaha tsəfukurən mə samokeikei pərhien

* **4:21:** Mat 5:44-45, Mak 12:29-31 * **5:1:** 1Jon 4:15

nīpwnəti Kumwesən me? Trini minuə samokeikei Kumwesən, nənə mamho nəgkiariien me səvənhi, noien nəha ramahatən pen mə kitaha samokeikei pərhien irəha. ³ *Trini minuə samokeikei Kumwesən nīpwrən i tsamo nəgkiariien me səvənhi. Nənə nəgkiariien me səvənhi həpkiipam mhə tukutaha, ⁴ *ti nəri nə mə kitaha pam nīpwnəti Kumwesən me saməuvehi irapw niskaiien səvəi noien ərəha me kamo ia tīprənə i. Nəri sə saməskai irə rauvehi irapw niskaiien səvəi noien ərəha me kamo ia tīprənə i in i nahatətəien səkitaha. ⁵ *Sin ko ruvehi irapw niskaiien səvəi noien ərəha me kamo ia tīprənə i? Iərmama sə rani nīpərhiienien mə Iesu in Tini Kumwesən, iərmama nəha in əpa ko ruvehi irapw niskaiien səvəi noien ərəha me kamo ia tīprənə i.

⁶ *Iesu Kristo in iərmama sə rīməuvehe ko paptəes irə ia nui marə memhə mwi niten raiu. Ripko mhə in iərmama sə rīməuvehe ko paptəes əpa irə ia nui, rekəm. Mətə in iərmama sə rīməuvehe ko paptəes irə ia nui marə memhə mwi niten raiu. Nənimwīn Ikinan rani irapw mə nəri nəha ro nīpərhiienien, ti nəri nə mə Nənimwīn Ikinan in nukune nīpərhiienien. ⁷ Nəri kahar hamarni irapw nəri nəha mə ro nīpərhiienien, ⁸ *Nənimwīn Ikinan mine nui mine netə. Nənə nəgkiariien səvənrahar kwatia. ⁹ *Nəpīn me kitaha saməni nīpərhiienien ia nəgkiariien səvəi iərmama, mətə nəgkiariien səvəi Kumwesən ro

* 5:3: Jon 14:15,23-24, 2Jon 6, Mat 11:30 * 5:4: Jon 16:33

* 5:5: Rom 8:37, 1Jon 4:4 * 5:6: Jon 1:29-34, 19:34 * 5:8:

Jon 15:26 * 5:9: Jon 5:32-37, 8:18

nəgsen məpi raka, ti nəri nə mə nəgkiariien nə nəgkiariien səvəi Kumwesən. Nənə in ruvəuvei pehe raka nəgkiariien səvənhi raməgkiari ia Tini. ¹⁰ *Iərmama sə rani nīpərhienien ia Tini Kumwesən rauvehi nəgkiariien nəha ia rerin. Mətə iərmama sə rīpkini mhə nīpərhienien ia Kumwesən, in rani Kumwesən mə ieikuə riti, ti nəri nə mə in rīpkini mhə nīpərhienien ia nəgkiariien sə Kumwesən ruvəuvei pehe raka raməgkiari ia Tini. ¹¹ Nəfe nəha nəgkiariien? Nəgkiariien i in i. Kumwesən rīməuvei pehe nīmīruien rerin m kitaha, nənə nīmīruien nəha saməuvehi ruku pen ti Tini. ¹² *Iərmama sə rauvehi Tini Kumwesən rauvehi mwi nīmīruien, mətə iərmama sə rīpkuvehi mhə Tini Kumwesən rīpkuvehi mhə nīmīruien.

Nīmīruien rerin

¹³ *Iakamrai nəgkiariien me i rauvehe tuku-miaha. Kīmīaha nərmama səməme hiaməni nīpərhienien ia nəghi Tini Kumwesən. Iakoikei mə kīmīaha tihəukurən mə hiəuvəuvehi raka nīmīruien rerin. ¹⁴ *Nənə təkwtəkwwuni, trini mīnuə kitaha səfwaki m Kumwesən, nari riti nəha ikin ramasitu ia kitaha mə tsəpwəh nehekīrien. Nəri nəha in i Kumwesən ruvəni raka mə triregi nəfwakiien səkitaha, mətə nəfwakiien səkitaha traməkeikei mhesi pen atukwatukw nətərigien səvənhi mine nəfe in rokeikei mə tro. ¹⁵ Trini mīnuə səukurən mə in triregi nəfwakiien səkitaha, nəfe nəghin tsəres in i, nənə səuvəukurən raka mə tsəuvehi.

* **5:10:** Kal 4:6 * **5:12:** Jon 3:36 * **5:13:** Jon 20:31 * **5:14:** Jon 14:13, 16:23, 1Jon 3:21-22

16 *Trini minuə kimiaha riti rətoni piəvni riti ramo noien ərəha mətə rīpko mhə noien ərəha sə ramiri pen in mə tremhə, kimiaha tihəfwaki tukwe pwəh Kumwesən ruvei pen nimiruien min. Mətə noien ərəha riti nəha ikin sə ramiri pen iərmama mə tremhə. Nənə iou iapkini mhə mə tihəfwaki ti nərmama səməme kamho noien ərəha nəha. 17 Nərmama me pam səməme kamho noien sə rīpkatukwatukw mhə kamho noien ərəha, mətə noien ərəha me nepwīn nəha ikin səməme həpkiri pen mhə irəha mə tuhemhə.

18 *Kitaha səukurən mə iərmama sə in tini Kumwesən, Tini Kumwesən atukwatukw rauvehi amasan in. Ro iamīnhi irə iərmama nəha ko rīpkəmwur pen mhə ia noien ərəha, iəremhə ərəha Setan rīreirei nīrapiien in. 19 *Kitaha səukurən mə kitaha nīpwnətī Kumwesən me, mətə nərmama səvəi tīprənə irəha pam kamharə ia rəgi iəremhə ərəha Setan. 20 *Kitaha səukurən mwī mə Tini Kumwesən rīməuvehe, muvei pehe nukurənien m kitaha mə tsəukurən Kumwesən i Kumwesən pərhien. Nənə kitaha səuvəuvehe raka mhəpwit əknekīn ia Kumwesən nəha. Iakani iamīnhi irə ti nəri nə mə səpwit əknekīn ia Tini, Iesu Kristo. In nə Kumwesən pərhien. In nə nimiruien rerin.

21 *Nīpwnətīk me. Tihətui amasan tukumiaha me mhəpwəh nəfwakiien m nənimwi nari me.

* 5:16: Mat 12:31 * 5:18: 1Jon 3:9, Jon 17:5 * 5:19: 1Jon 4:6 * 5:20: Jon 17:3 * 5:21: 1Kor 10:14

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416